

四明叢書

張宗祥



序

吾鄉趙清臣先生諱善湘著洪範統一一卷攷其自序
爲宋寧宗開禧三年作先生開禧元年添差通判婺州
嘉定元年以招茶寇功赴都堂審察提轄文思院時蓋
猶在婺州也宋史謂之洪範統論文淵閣書目又作統
記然其序曰遂撰洪範統一是作統論作統記者非也
惟棊竹堂書目授經圖焦氏經籍志續通志皆曰洪範
統一則得其實矣宋當寧理之際外怵於金人內掣於
李全燕雲未復江淮垂危此其世爲何如世乎故其開

宗明義曰箕子亡國之宗臣也始見之頃寧無盡然于心乎先生固宋之宗臣也特於解洪範發之故又曰皇極不建則九疇不敘而彝倫斁矣以皇乃皇皇上帝之皇極棟也屋脊之棟言眾木之極至也又曰輔相協和之則在有土之君蓋九疇之敘以極爲五始于五行終於六極皆皇極爲之用也得其用而一以貫之統一各篇意在斯乎昔劉向見漢祚之將危權歸外戚屢陳妖眚而不見納遂因洪範春秋災異報應者爲五行傳歐陽永叔謂失其倫理呂東萊謂其博而未純蘇眉山至

謂說者多而行之寡曰諸儒使然夫烏知乎中壘之有
不得已者乎先生雖與中壘之意同顧以五行五事皇
極庶徵福極五者合而求災異之應而于八政五紀三
德稽疑四者離不相屬豈洪範之旨乎於是悉歸于皇
極之建不建以合於福與極不獨釋皇極與二孔合而
與朱陸往返辯難各持一說者亦得會歸矣通於此說
其知所以爲天下乎豈僅立論於一時哉若夫九疇本
於洛書猶之八卦本諸河圖見於經而著於史述於諸
子百家未有能非之者然必以爲初一以下皆洛書文

為六十五字又曰實二十七字且又曰三十八字詳見書注

疏則鑿矣抑先生善易易與範實相表裏於易凡六稿

日進日益見趙汝楳周易輯聞序其子汝楳序易曰近而顯者百

姓與能遠而微者賢智未易知信哉今天下亦騷然矣

不惟中國也五行所以生人而轉以殺人顛倒陰陽無

所不用其極天方酷虐人盡此倘安得有大禹者起相

其人而畀之範更安得有箕子者歸訪其道而傳其疇

使厥居協而彝倫敘乎刻既竣因書於端時民國二十

九年九月後學張壽鏞

自序

洪範九疇聖人經世之大法太極渾然之先其道已具
三才既判之後天畀之聖人而責任彝倫攸敘之責行
虐古今不可泯沒天地由之而萬化顯其用聖人以此
而斯民獲其所非區區操天下者所能與也由五行至
五紀安行乎皇極者也由三德至福極輔成乎皇極者
也皇極居于五主張綱維是者也疇惟有九其統則一
自漢世儒者爲災異之說乃以五行五事皇極庶徵福
極五者合而求災異之應而于八政五紀三德稽疑四

者離不相屬其後爲史又皆祖述漢儒獨歐陽唐史紀
災異而不言事應眉山之學亦以福極于五福不相通
悉歸于皇極之建不建嗚呼洪範九疇果可以意離合
之乎昔者天畀之禹禹傳之箕子箕子以是諫受不聽
武王以之歸遂作洪範明夷之五六曰箕子之明夷利
貞明入地中明夷天道在地君道在臣六五君位而箕
子居之以洪範之在箕子也洪範天道也君道也而可
易窺乎善湘幼業書長無所聞竊謂漢儒離合之說非
洪範之本旨遂撰洪範統一庶幾成歐陽眉山之志然

未知有得于箕子否也開禧三年中秋前五日趙善湘
敘

月

刊本

洪範統一

宋鄞趙善湘清臣撰

惟十有三祀王訪于箕子王乃言曰嗚呼箕子惟天陰
隲下民相協厥居我不知其彝倫攸敘

商曰祀周曰年洪範周書稱祀蓋箕子自序其事而
周史因而書之也王訪于箕子就見之也武王可使
箕子歸周不能使箕子朝王道不能屈也方念天下
之民未安其居彝倫不得其敘道在箕子而可臣致
之乎武王訪之不失爲尊訪而問之遂陳洪範箕子

不爲失節武王所以聖箕子所以仁也乃言者徐然
後言曰嗚呼箕子者感歎之辭武王何心于有天下
以彝倫之失其敘天命在周武王不獲已而有之然
箕子亡國之宗臣也始見之頃寧無盡然于心乎惟
天陰隲下民莫不欲安其居而輔相協和之則在有
土之君受不能相協民居使至于亂武王代興未知
彝倫攸敘其心恐懼訪箕子而後問武王之心天之
心也所問天之道也天錫禹洪範九疇而傳之箕子
箕子不得其位行之而武王以箕子歸首及于此洪

範之傳不在武王乎

箕子乃言曰我聞在昔鯀墮洪水汨陳其五行帝乃震怒不畀洪範九疇彝倫攸斃鯀則殛死禹乃嗣興天乃錫禹洪範九疇彝倫攸敘

箕子之于武王亦難矣徐然後言見其不獲已之意欲陳九疇而先及鯀禹之事蓋言得道者昌失道者亡也堯之時洪水爲害四岳舉鯀以治鯀墮洪水汨陳其五行不能相協民居彝倫斃矣故天怒而殛之不畀洪範九疇殛之者舜而舜以天殛之故曰帝乃

震怒不畀洪範九疇彝倫攸斁天豈不欲畀鯀鯀不能循乎自然之道績用弗成鯀自棄于天雖欲畀之不可暨禹之興地平天成六府三事允治天乃錫禹洪範九疇彝倫攸斁天豈以之私禹禹能平治水土彝倫復得其敘則洪範九疇在禹矣雖欲不錫之亦不可天固何心于其間哉亦猶受自絕于天數其彝倫箕子之諫不聽是天不畀洪範九疇武王應天順人而汲汲以彝倫攸斁爲問則洪範九疇亦在武王矣實天錫之也箕子可得而不陳乎箕子爲此數語

然後成九疇也

初一日五行

此九疇之始也九疇何始于五行天一生水地二生
火天三生木地四生金天五生土自有天地而五行
生焉故洪範九疇始乎五行也或曰洪範九疇五行
五事五紀庶徵皆五而皇極經世書其數皆四何也
曰五行之于土五事之于忠五紀之于曆數庶徵之
于風皆皇極經世之道也經世書主於皇極故其數
四而已以皇極足之五矣

次二曰敬用五事

此以下皆自然之敘天地分而水火木金土爲天地之五行人生乎天地之間而貌言視聽思爲人之五行得於形象之初而根於固有之性其道則一也聖人出而天下治苟不先敬此五事則吾身之五行先汨之矣何以致彝倫之敘耶

次三曰農用八政

天地有此五行矣聖人敬用此五事矣所以施之天地之間者宜孰先焉經曰惟天地萬物父母惟人萬

物之靈賈聰明作元后元后作民父母八政者豈非
父母斯民之急務乎政非獨此八者而此八者亦天
地自然之序有不可或闕也農農事也八政自一曰
食至八曰師無非養民皆本之於農事苟不知務本
則八政何由自致其用注曰農厚也按釋文馬氏曰
食爲八政之首
故以農名之趙氏以務
本釋農字合於古訓

次四曰協用五紀

八政本於天地閒之固有而見於聖人五事之敬用
天運乎上地成乎下聖人擅域中之大而不明乎天

道則政亦乖矣故治曆明時取法於天凡有不協於五紀者皆當致其察也如是則寧有悖違天道之政爲民害乎

次五曰建用皇極

皇乃皇皇上帝之皇大之不可名言也說文解字通釋曰極棟也屋脊之棟言眾木之極至也經曰會其有極歸其有極言之甚明不曰大中者言皇極之道有非大中之所能盡也九疇之數以五爲極九疇之敘以極爲五始于五行終於六極皆皇極爲之用也